


# MULUKU TI MUTAPHULELI

## AWE MWANENE

 Tith'ihu a Wirimu, Nuulumo nimosa nnikhuma wa Nyuwo naamuhimya etthu vanci-ene ovikana ele atthu othene yaarow'aya wira wala ohimya okathi p'ukathi, okhala wira atthu anwehererya owoonani Nyuwo. Ni hiyo ninnooxukhuruni Nyuwo okhala wira aakhala ale ari ni nrromelo, awo anwehererya etthu wiraneya. Nto atthu yakhala oovoliwa ntthona mwaha w'etthu, yowiixa yiihanaka Yowiixa, ehana okhala Yowiixa emosa wira yaakhule wiihana iwo. Tivo hiyo nry'ahu va ohiy'ula, okhala wira eyo yaari mmurimani mwa arumeyi ala, n'atthu, othukumana vamosa wira noovekeleni mahala ni iparakha, naaminiki wira Nyuwo munimwavoniha aretta n'uwoopola ale oorimeela, ni munimooniherya Masu Anyu.

<sup>2</sup> Nto hiyo ninvekela, Tithi a Wirimu, wira Nyuwo munivahe ela hiyo okathi nnooweherery'ahuni Nyuwo mwa wiiyeviha, ohiyu p'uhiyu. Okhale o—omwarexiwa wa Eroho Yowarya, ni wira khula mutthu akhale oohoona etthu p'itthu ekina mwa yowo wohikhala Muluku. Wira okhale mukhuwelelo muulupale onikhuma mw'atthu, ari ni ntthona na Muluku, mpakha muhakalaliho ophiye mulaponi mu ni khula ekereja ekhale yoosareya atthu, anatampi yinlaka wira Muluku aamorele ikharari, ni—ni Eroho Yowarya yaavonihaka aretta, ewettihaka ale oorakala, ni yahihimuxaka ale ookhwa, ni evahaka itthu iya sihimuwe muhina mwa Masu Anyu.

<sup>3</sup> Murwe, Pwiya Yesu, ni mmumaliherye natiri Anyu. Murwe mwa hiyo ohiy'ula. Hiyo ninnaamini wira Nyuwo mwa mmosaru nsana, olelo, ni mahiku othene, wira anatiri Anyu khankhalakhala avonyeyaka. Siso erimu n'ilapo ya vathi sinoovonya masi Masu Anyu khanvonyeya. Wira maiwelo ahu akhale ootthukuwa. Eroho Yowarya erwe ni etthokihe ematta y'olima. Wira maiwelo ahu akhale ootthukuwa wa Eroho ni owerya wa Muluku ohiy'ula, wira Owo ooniherye Masu Awe a natiri mwa hiyo. Siso hiyo ninvekela mwa Nsina na Yesu. Amen.

<sup>4</sup> Vano, ohiy'ula, nyuwo muniweha yosoma, nimukhunle Bibilia Elivuru ya Pedru Aneenli, ni nipacerye ni versikulu 15, sintoko enamuna y'olavula mwa Solempwa okathi vakhani.

*Nave miyo kinrowa ophavela okathi wothene wira kakhwa vale mukhalane itthu iya mahiku othene muupuwelaka.*

*Maana hiyo khanittharihenle ihantisi soowaaleliwa, okathi noosuvelinh'ahuni ikuru ni orwa w'Apwiya Yesu Kristu, nnya hiyo noonale ni maitho ahu ovuwa wawe wuulupalexa.*

<sup>5</sup> Hiyo okisivela eyo, “noonale ni maitho ahu.” Kahi ehantisi. Hiyo n'anamoona a etthu enlavul'ahu.

*Maana owo ohaakhela wa Muluku Tithi nttittimiho ni ovuwa, ni naahimurwela nsu nikhumaka m'ovuwanu wuulupalexa, Ola Mwan'aka onimphentex'aka, mwa yola Miyo kinnitteeliwa murima.*

*Ni nsu nla naakhumme wirimu hiyo naahiiwa, okathi waary'ahu n'wwo omwaako woowaarya.*

*Ni hiyo nookhalana masu oolipihiwa a maprofeta; yawo nyuwo muniir'anyu saana nwiriyana, sintoko muthuko onivarela mwe . . . nipuro n'epiphi, mpakha oxa, ni nivoroxa ophattuwa mmurimani mw'anyu:*

*Musuwelaka ela toko, wira khaavo masu alempwe akhanle ootaphuleliwa ni mutthu mekh'awe.*

*Maana masu khayaruule okathi wa khalai n'utthuna w'atthu: masi atthu oowaarya a Muluku yaalavunle yeettihwaka ni Eroho Yowarya.*

<sup>6</sup> Apwiya yincererye iparakhha Saya osoma wa Masu Aya. Vano, miyo kinrowa okuxa ela ntoko mwaha: *Muluku Ti Mutaphuleli Awe Mwanene.*

<sup>7</sup> Hiyo ninkhala nihiku na mawoowo. Hiyo ninkhala nihiku okathi alopwana n'athiyana vanaarikel'aya osuwela etthu yowira. Ithtu sothene, si—sinikhala ntoko siri m'owuukhuwa. Ithtu sothene, enikhala ntoko sookhala inamuna sinci-ene soovirikana wuupuwela. Owo ti Satana, oniira yeyo.

<sup>8</sup> Vano, Muluku khanimulamula mutthu vaxariya, voolikana, vahikhanle wira yookhala ettharihelo mwa yeyo Owo orin'awe yo waalamulana. Ni Bibilia onihimya wira Owo onrowa waalamula atthu othene mwa Yesu Kristu, nto Yesu Kristu ti Masu. Mwa Yohani Owarya, kapitulu 1, Awo ahimmye:

*Wopaceryani naari Nsu, ni Nsu naari ni Muluku, ni Nsu naari Muluku.*

*Vano Nsu nihiiipaka erutthu, khukhala ni hiyo, . . .*

<sup>9</sup> Vano, sothene hiyo siry'ahu olelo wooniheriwa wa mikhalelo Sawe. Mwa Muluku . . . Opacerya-wene Owo nnakhala khaari Muluku, Muluku, hiyo naarowa omwiihana pahi “Ole Ohinimala.” Owo khaari Muluku, okhala wira nuulumo (nuulumo n'Enkelesi) *Muluku* enihimya “etthu enikokhoreliwa” ni khayakhanle hat'etthu wira emukokhorele Yowo. Siso Owo aari Ole Ohinimala, e—Ephattuvelo yuulupalexa ya osuwela wothene. Nto vEphattuveloni vaava wa osuwela wothene

khayakhanle etathela, nipattuxa, wala hat'etthu, okokola hata nipuro, ettheneri, mweri, hat'etthu ekina. Muluku, ele hiyo ensuwel'ahu ntoko Muluku, Eroho yuulupale yaari Yohimala (khenatoko opacerya, khenatoko omala), Owo aari vavo. Ni mwa Yowo saahikhala mikhalelo: saahikhala mikhalelo s'okhala Muluku, nto mikhalelo Sawe s'okhala Tithi, mikhalelo s'okhala Mwana, mikhalelo s'okhala Moopoli, mikhalelo s'okhala Mpenuxa. Mikhalelo sothene iya saari mwa Yowo. Nto vano Owo. . . Itthu iya sinikumiheriwa opacerya okathi yowo mikhalelo Sawe pahi sinooniheriwa.

<sup>10</sup> Etthu enihimo'aka, *mikhalelo* saari "miyupuwelo" Sawe. Ni nu—*nuulumo* "muupuwelo olavuliwe." Nto vo eyo yaari mmuupuweloni M'wawe. Nto okathi Owo ohimaly'awe, "Ekhale," vano yaahikhala. "Ekhale," vano yaahikhala.

<sup>11</sup> Nto vano, muupuwele, nyuwo aKristu mwaari miyupuwelo Sawe ohinatthi okhala olumwenku. Nto nyuwo mwa eyoniheryo wa muupuwelo Awe. Ohinatthi hata okhala olumwenku, nyuwo mwaari mwa Kristu, (amen) mwa Muluku wopaceryani. Eyo ennokhalihani, nto, nyuwo moone, atthu Awe. Nto etthu yothene ti Muluku, Mwanene, aikhalihaka Mmansawe owaapapeleya wira Owo akhale ookwanyiswa, wooniwa, ni—ni sikina. Nto ti yeyo Muluku ory'awe, etthu yothene.

<sup>12</sup> Nto atthu anira, "Otaphulela. . ." Miyo kaalavula va wohikhala khalai eriyari ya muthukumano, mulopwana mmosa khukihimeerya, owo khwira, "Munna Branham, nyuwo murina otaphulela woovonyeya. Nyuwo khamuntaphulela Eyo oratta-ene."

<sup>13</sup> Vano, hiyo ninniiwa. . . Awo anrowa oMetotista, ni wira "aPatista khantaphulela oratta-ene." aPatista anira, "aPentekosite khantaphulela oratta-ene." aPentekosite anira "A—aUnitaria khantaphulela oratta-ene." aUnitaria anira, "Asempeleya khantaphulela oratta-ene." Nto khula mmosa onira akina khantaphulela oratta-ene.

<sup>14</sup> Muluku ti Mutaphuleli Awe Mwanene! Owo kxanimphavela hata mutthu wira amutaphulelele Yowo. Owo onitaphulela Mwanene. Mutthu ti pani wira awerye omutaphulela Muluku? Muluku ti Mutaphuleli Awe Mwanene.

<sup>15</sup> Vano, Pedru alavulaka va, hiyo ninnoona wira wopaceryani okathi Muluku iraly'awe, "Okhale okokola," vano okokola khukhala, eyo t'utaphuleliwa waya. Okathi Muluku ohimaly'awe etthu p'itthu vano eyo khooniheriwa, nto eyo t'utaphulela wa Muluku wira Masu Awe t'ekeekhai. Munnona? Okathi Owo iraly'awe, "Okhale okokola," eyo yaari mmuupuweloni Mw'awe toko ehinatthi okhala etthu ntoko okokola. Okathi Owo iraly'awe, "Okhale okokola," okokola khukhala osulu, eyo t'utaphuleliwa. Khaavo orina yo otaphulela eyo, maana Muluku ohimnye siso vano yaahikhala. Okathi

Muluku onlavul'awe nto eyo khooniheriwa, eyo t'utaphuleliwa wa Masu Awe. Atthu ahinweryelani wona yeyo? Atthu ahinoonelani yeyo?

<sup>16</sup> Okathi Muluku onimulap'awe natiri nto Muluku onaira. . . Wo—wopaceryani, mwa Maphattuwelo, Owo oovaha Masu Awe a wakhula okathi okathi Owo waarw'aya okhuma wopaceryani mpakha wokiseryani. Nto, oviraka okathi-ene yola, olumwenku wa ekereja ori ni itthu iya sothene voomalela sootakanxiwa ni ikano, ni sikina, ni Muluku okathi wothene onnaaveleeliha, okhuma Waataana wa Khalai ni wa Naanaano, maprofeta! Ni Masu a Apwiya anirwa wa profeta. Nto Awo aniira sai? Eyo enooniherya Masu a Muluku. Wooniherya wa Muluku, eyo ennihimya sinto ekeekhai wala ti yoovonyeya. Khaavo orina yo otaphulela Yawo, Masu aniitaphulela Mmansaya. Muluku oohimya nto tthiri enookhumelela!

<sup>17</sup> Eniphwanyiha exeni ohimya etthu ekina mwaha wa Yeyo? Natampi xeni aarowa weererya wira (okathi Muluku omulamp'yawe natiri nto Muluku onnimmaliherya) wira otaphuleliwa iwo ti woovonyeya? Owo ti Muluku Mwanene aruuhaka otaphulela Wawe Mwanene, ataphulelaka. Owo khammutthuna hata mutthu wira amutaphulele Yowo, Owo oniitaphulela Mmansawe ooniheryaka ele Owo aahimaly'awe wira aamwiira.

<sup>18</sup> Oh, vaakhanle wira ekereja enniwerya pahi wona yeyo ni owona anatiri yaavaheriwe khula okathi! Okathi wothene mukina, Muluku onniveleeliha (hata mwa ovira wa okathi mithanu na miili sa ekereja) ni ohooniherya sothene Owo aahimaly'awe wira. Itthu sothene, khekhanle etthu emosa ehiiriwe. Voolikana-ene! Etthu Owo aahimaly'awe wira aamwiira, eyo Owo ohiira.

<sup>19</sup> Okhala wira okathi Muluku ohimmy'awe, ottuli wu mwa Yesaya, Owo aahihimya, "Mwali harus i onorupala," vano owo aahirupala. Vano, t'ani—t'ani onwerya otaphulela yeyo? Muluku aahitaphulela. Owo aahimye wira, "Mwali harus i onorupala," vano owo aahirupala. Vano, exeni nyuwo. . . nyuwo khamunwerya. . . Khiyavo enweryaneya ohimmwa mwaha wa yeyo, okhala wira Muluku aahihimya wira owo aamurupala ni aahirupala. Masi ekereja yaari n'evasi vanci-ene okathi uwo wira ehoone. Moone, awo jaarina ankhili aya anene mwa yeyo. Eyo yaari yoovirikana vanci—vaci-enexa ovikana ele awo yaaweherery'aya.

<sup>20</sup> Pedru va aamuhimya, owo khwira, "Muluku aamonihenrye Kristu ni Masu Awe, Owo khwira, 'Ola Mwan'aka onimpentex'aka.'" Atthu-owaamini ala yaaphwanyaneya vavale. Vano Kristu aari wooniheriwa wa Muluku. Owo okathi wothene aamooniherya Kristu mwa Masu Awe, okhala wira Kristu ti Masu. Owo onnimooniherya okathi wothene.

21 Okathi Owo iraly'awe. . . Mahiku a Nowe, Kristu aari mwa Nowe. Nyuwo munnaamini yeyo? Nowe khwira, "Enoorowa orupa epula. Enookhala epula, elapo enoohononiwa." Yaahirupa. Eyo khayaatthuna hata otaphuleliwa. Epula yaahirupa okhala wira Muluku, mwa Nowe, aahimnye wira, "Enoorowa orupa epula." Owo aari profeta, nto ekeekhayi okhala wira etthu owo aahimaly'awe yaahiraneya. Vano khentthuneya awo otaphulela eyo.

22 Akina wa awo, poti, yaahimnye wira, "Mulopwan'ola khansuwela etthu enihimy'awe."

23 Masi Muluku okathi wothene aahihimya, "Akhala mmosa eriyari anyu ori mw'eroho, wala profeta, ni ele enihimy'awe wiraneya, vano mwiiwelele yeyo." Ti yeyo, okhala wira ekeekhayi. Eyo ehaana okhala ntoko Masu. Ni Nowe aari v'olikana ni Masu. Okathi owo aahimaly'awe wira yaamurupa epula, nto yaahirupa. Eyo khayatthuneya hata otaphuleliwa mwaha wa yeyo, okhala wira ti yeyo yinry'aya.

24 Yesaya aahimnye wira, "Mwali harus i onorupala," nto aahirupala. Vano, yaari yootikiniha vanci-ene. Maana, moone, eyo yaari iyakha imiya sowatta oholo waya mwali ula ahinatthi orupala.

25 Eyo yaari yootikiniha mpakha mulopwana mmosa ooreera murima aahianiwa Yosefe, iy'awe, "ari-ene mutthu a xariya khaatthuna omulaleya. . ." Mulopwan'ole ooreera murima mahiku ale, yaarowa okhala sai ni Yosefe okathi owo ari-awe mposi, amwaakamelaka Maria.

26 Owo aamwaakameliwa. Nihiku nne, ohonona eyo, yaari vamosaru ntoko oraruwa. Nto, vekeekhai, mwa Yosefe, yaakhala ntoko wira Maria eererya omukhalaha ntoko ettiyelelo, wala omwiiriha owo okhala mwakiheryo w'evonyero awe, 'okhala wira va owo aaphwanyaneya akhalaka maama, ahikhanle ootheliwa, aakameliwaka pahi. Ethepeyelo ntoko yeyo, waamukhala ovonyiwa ni maluku mpakha okhwa; yaahaana okhala, mwa ikano.

27 Nto Yosefe, iy'awe, aari mulopwana a xariya, mutthu a xariya vanci-ene. Owo aanimwaamini Muluku. Nto okathi owo omuwenh'awe ni maitho ale ooreera, maalupale ni oosivela, nto khwira, "Yosefe, Kapiriyeli Munkelo muulupale ookithotola khukihimeerya wira miyo kaamurupala, w'ohimusuwela mulopwana."

28 Vano, Yosefe aawenheru mwa Solempwa pahi, profeta aahihimya wira aamurupala! Owo aari Muluku pahi ataphulelaka Masu Awe Mwanene! Munnona? Masi eyo yaari yootikiniha vanci-ene.

29 Owo ti mulattu okathi p'ukathi. Masu a Muluku t'oletto wa atthu; T'otikiniha vanci-ene. Muluku okathi wothene oniira yootikiniha. Ti yootikiniha khula nipuro Muluku onkhal'awe-

vo. Ti yoovirikana ni iyettihelo sa m'olumwenkuni, okhala wira awo anikhala n'ithu sintoko awo anuupuwel'aya wira saahaana okhala. Masi Muluku onorwa ni wira yootikiniha.

<sup>30</sup> “Aarowa owerya sai harusisi ola orupala?” Owo aari a xariya, owo aahimwaavya Muluku mwaha wa yeyo.

<sup>31</sup> Nto vo Muluku khulavula ni yowo molohani, nto khwira, “Yosefe, nyuwo mwana a Davidi, muhoovelele omwaakhela Maria okhala mwaar'inyu, maana ele erupaliwe mwa yowo ti y'Eroho Yowarya. Muluku aaroomukhunela ni eruku. Ti yeyo yiiranen'ye.”

<sup>32</sup> Nyuwo mootoko owaha mota Muluku airaly'awe ni Yosefe wu? Mwa enamuna ya nenli, enamuna ya molohani. Vano, hiyo nosuwela wira sookhala soloha, hiyo ninnaamini soloha. Miyo kinnaamini soloha. Sookhala. . . Muluku okathi wothene anneetta n'atthu molohani. Masi oloha ethu yanenli, moone, poti okhala y'ekeekhai wala yoovonyeya vaahikhale wira nootaphuleliwa. Masi owo khaphavela hata otaphuleliwa. Aari Muluku Mwanene alavulaka oratta-ene ni Yosefe, okhala wira khaakhanle profeta mulaponi mahiku ale wira ataphulele. Khatonko okhala profeta mwa iyakha imiya xexe. Vano ethu yooreera yaatharelanne, wira Muluku aanikhapelela okhala sana, okhala wa Mwana Awe Ene, waari olavula ni Yosefe molohani ni wohikhalana otaphuleliwa. Owo khwira, “Muthiyan'owo ookhalana exariya. Ethu ile Yowarya erupaliwe mwa yowo Mwaana a Muluku.” Khiyaatthuneya hata otaphuleliwa.

<sup>33</sup> Muluku t'oniruuhela otaphulela Wawe Mwanene mirima sa exariya, s'ekhweli. Alopwana n'athiyana anweha e—ethu eri ya mwiiriirya, nyuwo mwakhalaru a xariya ni a ekhweli ni wamini, Muluku ookhalana enamuna yowootaphulelani nyuwo. Yopacerya, musuwele aakhanlene natiri. Vaakhanle wira Yosefe aahitthikela ottuli pahi kuhuhiya ilimalelo khumutthikela Bibilia, khusuwela, Yesaya aahimye wira owo aarowa wira siso.

<sup>34</sup> Nto ithu saalavuliwe, ni eyareliwo Awe, ni sothene mwaha wa yeyo soolavuliwa mwa Solempwa, “ni maprofeta masantu,” ntoko Pedru sihimaly'awe. Nto khaavo mutthu orina ehakhi y'otaphulela mmansawe yeyo. Ti yeyo tu Muluku ohimmy'awe wira yaamwiraneya. Owo aari wooniheriwa wa Masu a Muluku yaahimmwe a nihiku nne. Muluku aahihimya, siso vale yaahikhala. Yoomaliha mwaha.

<sup>35</sup> Yesu aahihimya. . . Okathi Owo waary'awe elapo ya vathi, okathi awo yahawery'aya osuwela sana muteko Awe, waari muulupalexa, orika, (awo khayawerya), woorikaxa, kiireke. Awo khayawerya onwiriyan Owo sana. Owo khwira, “Mwaavyavye Solempwa!” (Miyo kokhupali wira nkinoottiyani owaruni iwo, olavulaka vancipale yeyo.) “Mwaavyavye Solempwa,

okhala wira munuupuwela wira Memmo munoophwanya Ekumi Ehinimala, vano ti Seiyo sinkikhalela onamoona Miyo.” Munnona? “Ti Seiyo sinohimeeryani wira Miyo ki Pani.”

<sup>36</sup> Moone, Muluku aahivahererya Masu. Nihiku nne naari wira okhale wooniheriwa wa Muluku, Muluku (Emanuweli) ni hiyo, “Nsina Nawe onrowa wiihaniwa Oothamaleya, Namiruku, Mwene a Murettele, Muluku a Ikuru, Tithi a Mahiku othene. Nto Nsina Nawe onrowa wiihaniwa *Emanuweli*, ‘Muluku ni hiyo.’” Muluku aari mwa Davidi. Muluku aari mwa Moise. Muluku! Ti Muluku okathi wothene, aisoniheryaka Mmansawe okathi yowo. Masi okathi ula, “Mwali harusi onoorupala ni onoomuyara Mwana, nto Owo onrowa okhala Muluku ni hiyo.”

<sup>37</sup> Ti yeoyo awo yaamukhomelenl’aya Owo, wiikhaliha Mmansawe Muluku, nave-tho mwaha wo ohonona Esaapatu. Owo aari—Owo aari Muluku ovikana Esaapatu, n’Uwo aari Muluku. Ni Owo khaari mutthu pure pahi wala profeta pure (nave Owo aari Mutthu pure ni Profeta), masi Owo aari Muluku-Profeta. Ni Owo aari omaliheriwa wa Masu, vekeekhai yeoyo Muluku ahimmy’awe wira Owo aamwiira. Khwira, “T’ani a nyuwo onwerya okiphwanyana etampi? Mwaavyavye Solempwa! Memmo nyuwo munuupuwela wira munoophwanya Ekumi Ehinimala, vano ti Seiyo sinkikhalela onamoona Miyo.” Masi ilimalelo saya, awo yaakhala m’okaryani w’okathi mukina.

<sup>38</sup> Sintoko miyo saalaley’aka mwa isumana vakhani sivinre, “*Okhala m’okaryani.*” Okarya “etthu enooneya ottaiwene,” nsuwa niisaryelaka mmansaya, masi ti yowootooha. Ni khula okarya w’okathi mukina warya wowootooha. Atthu okathi wothene aneetta muhina w’etthu ekhumelenle iyakha sivinre. Maluterano aneetta m’okaryani wa Lutero. Warya wa nsuwa wa Lutero waari wooreera nihiku nawe; Wesley waari wooreera nihiku nawe; w’aPentekosite waari wooreera nihiku naya. Hiyo ninrowa niwelaka exikatta, hiyo ninkhala okathi mukina! Hiyo ninrowa oholo, oholo, nihikhaleke niwehaka ottuli.

<sup>39</sup> Okathi hiyo nnikhal’ahu n’itthu, nnoona wira nirina sothene, hiyo ninkhala ni ilimalelo sahu sinirukureryaka; nto eyo yaari yooreera nihiku nne, masi hiyo ninrowa oholo! Mwaavyavye Solempwa nto moone etthu ehimeriwe olelo, nto hiyo nnoosuwela vatthu vary’ahu, nto nnowerya ohimya vatthu vaniphwanyaney’ahu.

<sup>40</sup> Lutero; nyuwo poti oweha Solempwa ni wona ok—okathi ule wa Sarti, munoowerya wona v’ekeekhai etthu yaahimmwe. Nkanweheni nakhavalalo xeni aakhumme, nkawehani etthu yaaronwe okumana ni yowo, vekeekhai, “ankhili a mutthu,” elokiheryo. Nkanweheni Wesley, n’akina. Vaphiyaly’aya okathi wa Pentekosite, oviraka okathi-ene yowo, nkawehani mota eyo yeetaly’aya. Nwehe Solempwa nto moone vatthu vary’ahu.

Mwaha wa yeyo Yesu ohimmy'awe wira, "Mwaavyavye Solempwa!"

<sup>41</sup> Nkawehani vatthu vary'ahu! Miyo kookhupali wira nri w'Orwani wa Mwana a Muluku naanaano va. Miyo kookupali wira nri okathi wa—wa ewora yeyo enweryaney'aya Owo orwa okathi p'ukathi. Miyo kookupali wira Solempwa sinnihimya yeyo, wira hiyo nri iwora sookiserya sa wahala a olumwenku ula. Miyo kinniwerya wona itthu moota sinkhal'aya. Nkoonani Ekonselyo Ekumeniko ila yeettiheryaka ikereja sothene mwa yeyo, muhina mwa ekhanyeryo ya nxeni. Ni moone Omwene w'oRoma ni etthu oniir'aya, ni othene aya akina. Mwaawehe awo atakanxanaka, akhumihaka-mo Warya, akhumihaka-mo Ehapari yooreera. Athu othene anrowa okhala owiira mpanтта wa yeyo ni weetta mmithukoni mwaya ahiso nyuwo khamunrowa weetta nnakhala. Moone, hiyo nri okathi wookiserya. Khiyavo etthu ennihaleela wohikhala omuvarelela Muluku ni wamini Masu Awe. Masu okathi wothene t'ari ekeekhai.

<sup>42</sup> Okathi wa ekereja y'oLawotiseya, owo waari okathi mmosa wa ekereja, wa sothene saya, yowo Kristu oheliw'awe ota wa ekereja. Owo aari ota, amanaka. Exeni ekhumelenle? Ekonselyo Ekumeniku ila t'enrowa omuhela Owo ota. Bibilia ohimmye wira yaari wira Owo akhale ota, nto Owo t'ury'awe. Eyo enihiya exeni ota? Masu. Ni Owo ti Masu, Owo okathi wothene aari Masu, ni Owo nlelo ti Masu ohiy'ula! Owo ti Masu.

<sup>43</sup> Bibilia ohimmye wira, "Masu t'otepaxa wiitha, ooweryaxa onvikana xoowa oniitha ninno-ninno," aHeperi, kapitulu 4, "annilamula miupuwelo ni s'otthuna sa mmurimani." Masu yaari! Awo yaahaana omusuwela Owo aari Pani okathi Yesu aahimmy'awe eyo nihiku nne.

<sup>44</sup> Nkawehani etthu Owo iraly'awe. Nihiku nimoso Owo eemenle vale, wopaceryani wa muteko Awe. Aahikhala mulopwana mmosa aarwiye wa Yowo, aihaniwa Simoni, Simoni Pedru. Nto okathi Pedru omuwehaly'awe Owo ni—ni omoonaly'awe Yowo, Yesu aahimuhimeerya, "Nsina n'anyu ti Simoni ni nyuwo mwa mwaana a Yona." (Owo aahaana osuwela wira Moise aahihimya, "Apwiya Muluku anyu anoomuthanla Profeta onlikana ni miyo, nto Yowo muhaana onwiriya.") Nto va aari Mulopwana mmosa ahatonko omoona mwa makhalelo Awe, khwira, "Nsina n'anyu ti Simoni ni nyuwo mwa mwaana a Yona." Vano, owo aahisuwela vavale-vene wira ole khivaaweryaneya-tho okhala... Awo khayaakhalanne profeta mwa iyakha imiya-sene, nto va aari Mulopwana mmosa amuhimeeryaka owo aari pani. Khivanxankiha owo aawery'awe waakhela!

<sup>45</sup> Filipe, okathi ule, aahirowa khu—khumphwanya Natanayeli mukhitte mwa mwiri, khimuruuha mpakha wa Yesu. Yesu khwira "Ola va mwIsarayeli mwa yola khuvo-vo wootha."



Owo khwira, “Rabbi, mukisuwenle silini Nyuwo?”

46 Owo khwira, “Filipe ahinatthi owiihanani, okathi waaryanyu mukhitte mwa mwiri, Miyo kaahiwoonani.”

47 Owo khwira, “Rabbi, Nyuwo mwa Mwaana a Muluku! Nyuwo mwa Mwene a Isarayeli.” Owo aahisuwela wira aari yowo! Exeni? Khiyaatthuneya hata otaphuleliwa, Yehova aahimnye yeyo!

48 Vale yaaniphwanyaneya ale yahaaminni. Awo khwira, “Mulopwan’ola Pelizepuli. Owo ohana—Owo ohana othepya Owo onipak’awe. Owo—Owo nahako, wala etthu siso.”

49 Yesu aahaaweha, khwira, “Vano, nyuwo munlavula eyo munveehaka Mwana a mutthu, munooleveliwa. Masi okathi Eroho Yowarya enrwa’aya wira etthu emosaru, olavula muveehaka Yeyo, khamunkhalakhala muleveleliwaka, olumwenku ula hata olumwenku onirwa.” Owo aahimya ya nihiku nahu, nihiku naatthuneya hiyo wona. Maana Owo mmosaru nsana, olelo, ni mahiku othene.

Muupuwele, aari Yesu Kristu yowo aari mwa Moise.

50 Aari Yesu Kristu yowo aari mwa Davidi. Okathi Davidi, mwana a . . . Davidi aahiwela vamwako, mwene ookhoottiwa, khumunlela Yerusalemu, eyo khayari hat’etthu masi Kristu mwa yowo. Wa iyakha soophiyaka imiya thanu na ttharu oholo waya, Mwana a Davidi aahikilaathi vaMwako w’Olivera khuweha vathi oYerusalemu khunla, airaka, “Yerusalemu, Yerusalemu, imara sinci-ene Miyo kaaphavela woothukumanyani ntoko mwalyakhu ni axaan’awe, nto nyuwo khuhitthuna!”

51 Okathi Yosefe aaryawe mukhatteya, ole aari Yesu. Okathi owo aathumihw’awe musurukhu woophiyaka miloko miraru w’eparatha, ole aari Yesu. Okathi aakhalihw’awe mukhulupale wa Potifari, ole aari Yesu. Okathi owo aakilaanthi awe mono woolopwana wa Farawo. Ni okathi owo aakhum’awe, atthu othene. . . nlope naamuruma, nto atthu othene yaahaana okokhora, ole aari Yesu. Khavo mutthu aawerya orwa wa Farawo ahivinre—ahivinre wa Yosefe; khavo mutthu onwerya ophiya wa Muluku, ahivinre wa Yesu. Aari Yesu, Masu yaalavuliwe amalihewiwa, yaalavuliwe mwa iruku ni ithonyeryo.

52 Okathi Yesu waaryawe mu elapo ya vathi, Owo aahira etthu emosaru yaairale maprofa, tivo awo yaanisuwela wira Owo aari woonihewiwa wa Muluku wa Masu Awe. Eyo khayaatthuneya otaphuleliwa.

53 Okathi Natanayeli voonaly’awe ela, aahimorela vathi, khwira, “Nyuwo mwa Mwene a Isarayeli, Mwana a Muluku, Mwene a Isarayeli. Hiyo ninnoosuwelani Nyuwo, khavo aawerya wira ela.”

54 Nikotemu aarwiye ohiyu, khuhimya etthu emosaru mwa nsina na aFarisi. Masi, nyuwo moone, awo yaari oovariwa

muKonselyo Ekumeniko aya vahawery'aya okhupali Yeyo. Owo aahihimya ele yaahimmy'aya, khwira, "Rabbi, hiyo. . ." T'ani "hiyo"? Ekonselyo aya! "Hiyo noosuwela wira Nyuwo mwa mwixutthi okhumme wa Muluku, 'okhala wira khavo mutthu aawerya wira itthu iya 'Muluku ahikhanle ni Yowo." Awo yaahisuwela Eyo, awo yaanisuwela wira yaari Yeyo, masi awo yaari oovariwa memmo.

<sup>55</sup> Nto Muluku, mwa iyakha miloko mixexe sivinre, oottikinya elapo ela ni opatisu wa Eroho Yowarya, ni alopwana n'athiyana nlelo ari ota wa Yeyo okhala wira awo avariwe mw'etthu emosaru yeyo, akhalaka m'okaryani wa nihiku nikina. Mulattu aya xeni? Athu othene antthuna okhala Metotista, Patista, Prespiteriyano, Luterano, wala etthu ekina. Moone, iwo okaryaa.

<sup>56</sup> Awo yaakhala m'okaryani wa nihiku na Moise. Owo aahimye exeni? Owo ahimye wira. . . Awo khwira, "Hiyo n'arummwa a Moise."

<sup>57</sup> Owo khwira, "Nyuwo mwaamusuwenle Moise, mwaamukisuwela Miyo. Moise aahilepa mwaha wa Miyo!"

<sup>58</sup> Nyuwo mwaamusuwenle Lutero, maamusuwela okathi ula! Mwaamusuwenle Metotista, mwaamusuwela okathi ula! Maana Kristu aahilepa mwaha w'okathi ula! Masu animaliheriwa ahaana omaliheriwa okathi yola. Khanthuneya mutthu wira ataphulele yawo, Muluku t'oniruha ataphulelea Wawe Mwanene. Muluku oniitaphulela Mmansawe, okhala wira Owo t'Ule pahi onwerya ataphulele yawo. Anatiri a Muluku okathi wothene annilipiherya ele Owo ohimmy'awe, nto eyo t'utaphuleliwa waya.

<sup>59</sup> Vano, Yesu, (wira nihipwetexe okathi), Yesu oohimya, mwa Yohani Owarya, kapitulu 14, versikulu 12, "Ole onikaamini Miyo, miteko Miyo sinvar'aka nave-tho owo onoovara." Owo oohimya eyo? Ti yeyo. Eyo khentthuneya hata ataphuleliwa. Mutthu aavaraka muteko owo, owo ti Muluku. V'ekeekhai!

<sup>60</sup> Owo oohimya-tho mmo, "Ntoko saaryaya mahiku a Lotthi, siiso enookhala okathi onirw'awe Mwana a mutthu." Yesu oohimya yeyo. Owo oohimya eyo? V'ekeekhai, Owo oohimya! Eyo khivanthuneya hata ataphuleliwa.

Awo yaaira, "Vano, eyo yaahimya. . ."

<sup>61</sup> Eyo yaahimya v'ekeekhai yeyo Owo ohimmy'awe! "Ntoko saaryaya mahiku a Lotthi, siiso enookhala okathi onirw'awe Mwana a mutthu." Anki mahiku a Lotthi? Nrowe nitthikele ottuli okathi vakhani paahi, nisuwele etthu awo yiri'aya.

<sup>62</sup> Yaahikhala makhuru mararu a athu mahiku a Lotthi: oowaamini, owiipaka-wamini, ni oohaamini. Ti siiso ni khula muttitthi, etthu emosaru.

Hiyo ninniphwanya wira aSotoma yaari oohaamini.

Lotthi aari owiipaka-wamini.

63 Abrahamu aari mulipa-owaamini. Waari ni yowo waataana waalipiheriwaya. Owo aari ole aamulipelela mwana a natiri. Owo aari ole aamuwehererya yowo. Amen. (Miyo nkinihimerya “amen” mmansaka. *Amen* enihimya “Ekhale siiso!”) Ni ti yeyo. Abrahamu khaakhanle oSotoma. Abrahamu aari vasulu ni ota wa Sotoma. Owo ethoonyeryo a Ekereja ya murohoni olelo.

64 Lotthi ethoonyeryo a ekereja ya muromolelo nlelo oSotoma wu. Nwehe, Bibilia ohimye wira, “Itampi s’oSotoma saanihaaxa munepa awe wa xariya khula nihiku.” Owo ahaakhalanenleni ominyala wira avenye avirikanyihaka yeyo? Aakhala athtu anci-ene ooreera murima akilaanthi mukeraja olelo, aniweha n’uwoona athiyana n’akaputtula ni alopwana yiiraka ithtu seiyo, ni athtu aya arowaka, omuttikha musewe a golfi Ettiminku, ni maira a pikiniki, n’urapelela ni ithtu siiso, ohiya orowa okereja. Akilaathiki owani Namararu ohiyu, yoonaka etelavisau, ohiya orowa okereja. Awo annitthuna ohimya etthu mwaha wa yeyo, masi muthukumano waamuwoomola. Mulatthu wa xeni? Ti Lotthi emara ekina, awehaka vacanelani vawe ni wona etampi, ni oovaka wiihana etampi “etampi”!

65 Abrahamu khaakhanle mw’evitikavitikani mwaya, owo aari ota wa yeyo. Owo aari ethoonyeryo a Ekereja ya murohoni. Vano nkawehani etthu yaakhumelenle wookiseryani w’okathi pahi, okathi vakhani ohinatthi omora moro. Ni ale yaari Amalapo. Eyo yaathoonyerya moro omoraka m’olumwenku w’Amalapo olelo, okathi omwene sinrow’aya onyaanyiwa ni sinrow’aya opahiwa. “Irimu sinrowa okhala ni moro,” anihimya t’Apwiya, “ni sivarelaka sinrowa opaheya.” Ele yaari eruku aya.

66 Vano nrowe naatthokelele. Va ori Abrahamu ota, kahi oSotoma, owo aari ota w’oSotoma. Lotthi nlelo aari oSotoma.

67 Etthu yootikiniha, vaasiisu omosa wooviha, mwa okathi wa ewora ya namuloko ni emosa siiso yaakhanle, owo aahiwoona axilopwana araru arw’aka, axilopwana pure, yeettasaka muramphani, mphironi. Abrahamu aakilaanthi mukhitte wa karvalyo, amumulaka. Owo aari vate, alakela ni makoto a inama vaasiisu ule, khuphiya, ohalelaka ophiya othana eriyari. Nto owo khuwoona axilopwana araru arw’aka. Vano yaahikhala etthu emosa wa alopwana ale, wira, yaahimya etthu. Oh, wulu!

68 Yookhala etthu okathi wothene wa Muluku, okathi Eyo enirw’aya eriyari y’atthu, Eyo ennihimya etthu. Awo annisuwela Eyo. Yookhala etthu enaaleela, wira wookhala mulipiheryo vale.

69 Abrahamu aahitthimaka naanaanoru, khwira, “Pwiya’aka, murwe nno ni mukihye kiruuhe maasi vakhani, kirowele ni kirapihe metto S’anyu, ni koovaheni mukatthe mwamukhani, nto vo Nyuwo munootthikela murowaka, ephiro Anyu.” Vano Owo khirukunuwa. Owo khutthimakela munikotoni khinvara

muhore oolopwana a mompe khumwiiva, khimuruma namuteko wira amureerihe. Khurowa muheemani, vathi wawe, khunvekela Sara wira akhatte otthu, apake yamukhani, wala yolya, apake ephawu, ni apake mikatthe vaikho. Khuruuha khunvaha. Aryene vavale, alyaka, awo khupacerya oweha wira, Mulopwan'ola aakhala awehaxaxaka oSotoma. Nto Owo khwira. . .

<sup>70</sup> Anli a awo, muupuwele, yaakhuruwenle oSotoma. Anli yaaronwe oSotoma. Xontte muhialelele ela. Miyo kinihimya ele Yesu ohimmy'awe. Anli a awo khurowa oSotoma wira amukhumihe Lotthi n'ule aari oolikana wira akhumihiwe-wo. Nto ale anli yaakhuruwenle iwe, yaahirowa khulaleerya. (Nto aahikhala Mmosa aahanle n'Abrahamu. Nwehe ethonyeryo Owo aapank'awe.) Awo yaahaakhela ethonyeryo iwe, yaahikhala. . . aSotoma yaahipwexiwa maitho. Olaleya Ehapari yooreera okathi wothene enimukhaliha ohoona mutthu-ohinaamini. Nto nwehe etthu yaairinhe yeyo.

<sup>71</sup> Vano, ookhala Mmosa aaphwanyaneya nno khupaka ethoonyeryo oholo w'Abrahamu.

<sup>72</sup> Vano, nyuwo mootoko oweha? Khula namalepa a wahala, mutthare Solempwa, mmutthare wahala, khotonko okhala okathi mmosa wa okathi wa ekereja yowo mutthu aatonko awe orowa mukereja soweromola m'olumwenkuni wu, muhina mwa miromolelo mme, khatonko okhala mutthu nsina n'awe naamalela ntoko Abraham, h-a-m, khalai. Masi olelo ookhala mmosa, G-r-a-h-a-m. Ti yeyo. Arowaka iwe, awiihanelaka ota. Owo onivara muteko wooreera ni yeyo. Graham, Billy Graham, murumeyi a Muluku iwe eriyari ya miromolelo, atthu a ipolitika, ni sikina, alavulaka voothipelela.

<sup>73</sup> Nihiku nikina okathi awo yaatthun'aya wira owo atthimakele oMukhulupale, owo aahikhootta vowooneya. Muluku, amureerihe mwaha wa yeyo. Vano, mampa ala anipakiwa wiskhi, owo khaakhalakhala aphiyaka mulipiheryo w'opacerya ntoko yaarow'aya okhala. Awo yaamuhonona itolare ipilyau-sene, okhala wira owo aamukumiherya ota enamuna p'inamuna, mampa ala anipakiwa asikaro n'itthu ntoko seiyo. Moone, owo ori iwe ntoko namitthaka a Muluku wa aSotoma. Ti yeyo v'eekekhai

<sup>74</sup> Masi muupuwele, aahikhala Mmosa yowo aahanle vale n'Abrahamu, Mulopwana mukina, kahi ale anli yaaronwe iwe ntoko anamalaleya a mahiku ala yaaronwe iwe olaleya. Nwehe, aahikhala Mmosa aahanle vale. Anli yaahikhuruwela *epantte* ele, nto Mmosa aahanle *nno* n'Abrahamu. Nto Ole aahanle n'Abrahamu aahinvaha ethonyeryo.

<sup>75</sup> Vano nwehe, nsina nawe naari "Abramu" ni mwaar'awe aari "Sarai," nihiku nimosa wala manli ehinatthi iyo. Muluku aahimurweela owo khumuhimeerya, "Miyo kinoorukunuxa nsina nanyu vano na Abramu nikhale Abrahamu." (Moone, G-

r-a-h-a-m iletera thanu na mosa, mutthu.) Masi A-b-r-a-h-a-m siri thanu na piili, iletera thanu na piili; h-a-m, emalelaka ni h-a-m.

<sup>76</sup> Vano, osulu nno Mukereja ya murohoni, aahikhala Mmosa iwe aaronwe wa Abrahamu, nto nwehe etthu Owo aahimmy'awe. Owo khwira, "Abrahamu," (kahi "Abramu") "Abrahamu, ari vai amwaar'inyu" (kahi "S-a-r-a-i") "S-a-r-a? Ari vai amaar'inyu Sara?"

<sup>77</sup> Nwehe etthu owo aahimmy'awe, "Awo ari muheemani ottuli Wanyu."

<sup>78</sup> Nto Owo khwira, "Miyo kinmoothotolani. Miyo kinrowa woothotolani." Moone mukhalelo wa mutthu ule, Ole, amuttharihaka natiri Owo aamulampe awe. Owo aari Muluku! Owo khwira, "Miyo kinrowa woothotolani."

<sup>79</sup> Nto Sara, (mwa enamuna hiyo othene naarow'ahu osuwela sana) aahitheyi wiiphiini, meekh'aweru, owo khwira, "Miyo, muthiyana owuuluvala, iyakha emiya, apwiw'aka" (yawo aari Abrahamu) "nave-tho owuuluvala, aahiviriha okathi w'ekumi ntoko amiravo." Khwira, "Vano, hiyo khanaarowa owerya okhalana osiveliwa-tho siisaale, miyo kihuuuluvala n'awo ahuuuluvala." Nto khwira, "Hiyo khanakhalana eyo." Ni khwira, "Sai? Itthu iya khasaaweryaneya okhala!"

<sup>80</sup> Nto mu—Mulopwana (Muluku mw'erutthu ya mutthu) khwira, "Sara otheyenleni ni wanyiherya, ahimiyaka itthu iya?" Muheemani, ottuli Wawe.

<sup>81</sup> Vano nwehe, owo waahikhale muteko yole Yesu Kristu aarin'awe! Owo aaniweha vamuthukumanoni n'usuwela miupuwelo saya. Owo aahimuhimeerya Pedru aari ani ni nsina n'atithi awe naari ani. Aahimuhimeerya Natanayeli.

<sup>82</sup> Aahimuhimeerya muthiyana vehimiyeni, okathi owo... Owo aahimmye wira, "Murowe mukiruuhele maasi," wala "Mukiruuhele maasi."

<sup>83</sup> Owo khwira, "Mulopwana, khehiyo yolimalela Nyuwo olavula ni...nyuwo aYuta olavula n'aSamaria. Hiyo khaninlavulihana mmosa ni mukhw'awe."

<sup>84</sup> Owo khwira, "Masi nyuwo mwaamusuwenle Ole onlavulan'anyu, nyuwo mwaamukivekela Miyo maasi." Ovaanela waahikela oholo. Owo khwira, "Rowani mwawiihane aiy'anyu murwaase vaava."

Owo khwira, "Miyo nkirina iy'aka."

Owo khwira, "Moohimya saana, okhala wira mwaahikhalana athanu."

Owo khwira, "Mulopwana!"

<sup>85</sup> Nkawehani ovirikana wa owo n'a—n'anamukuttho ale a nihiku nne, ekonsilyo ile akhalaka m'okaryani wa nihiku nikina.

Awo yirale, “Ola xetwani!” Awo yaahaana okhalana yo wakhula muthukumano aya, ’okhala wira ti yeyo yaatthunaneya.

<sup>86</sup> Masi exeni muthiyan’ola namuhawi, Epyo ele yoothommwa yaaphwanyaneya mmurimani mw’awe...Owo aahooceya ni etthu ile, owo aahirowa mphironi ntoko namuttompe. Masi okathi voonalyawe Eyo, owo khwira, “Mulopwana, kinoona wira Nyuwo mwa Profeta. Hiyo khinnakhalane mmosa mwa iyakha imiya xexe, ni hiyo ninnihimeeriwa wira okathi Mesiya onirw’awe iyo t’itthu Owo onrow’awe wira.” Oh, wulu! Epyo ele yaaphwanyaneya vale yaahituphela mw’ekumini! Mwaha wa xeni? Eyo khayatthunne otaphuleliwa.

<sup>87</sup> Yesu khwira, “Ti Miyo kinlavula ni nyuwo.” Eyo khayatthuna hata otaphuleliwa. Owo aahipaka mwiirirya ni aahooniherya wira Owo aari Mesiya yowo, amen, ni v’ekeekhai aahihelela onamoona w’etthu Muluku aahimmy’awe (“Apwiya Muluku anyu anoomuthanla Profeta onlikana ni miyo,” aahimye ti Moise). Yaari exeni? Olipiheriwa wa Solempwa!

<sup>88</sup> Owo aahitthimaka arowaka opoma, khwira, “Murwe, mmoone Mulopwana mmosa Yowo okihimeenrye itthu siraly’aka. Kahi yola Kristu ene? Kahi Yowo ola? Owo ookihimeerya etthu kiraly’aka.”

<sup>89</sup> Vano nwehe, Yesu, aari Yowo iwe mwa Mulopwana ole aarina ettuli Awe erenryene eheema khuhimya etthu Sara uupuwel’awe muhina w’ehema.

<sup>90</sup> Masu a Muluku anihimya, mwa aHeperi, kapitulu 4, wira... Owo onihimya ela, “Masu a Muluku t’oweryaxa ni t’otepaxa wiitha onvikana xoowa oniitha ninno-ninno, athikilaka mpakha anikhomanyiwa makhuva, ni annilamula miupuwelo ni sintthun’aya murima.” Awo Masu! Ni khula okathi profeta aarw’awe, owo aarwa ni Masu, ni owo aari Masu a okathi yowo. Nto eyo yaaruha exeni? Muprofeta ole aalamula miupuwelo saari mmurimani.

<sup>91</sup> Yaari yeyo mwa Yesu Kristu okhala wira Owo aari omalela wa Masu.

<sup>92</sup> Ni Yesu ohimye wira, “Ntoko saaryaya mahiku a oSotoma, siiso enookhala okathi onrw’awe Mwana a mutthu.” Eroho ya Muluku yaamorwa elapo ya vathi mwa mukhalelo w’atthu, Muluku owooniheriwa mw’erutthu ya mutthu (Amen! Nyuwo munnona eyo?), ni aamwiira etthu emosaru yeyo Muluku aairaly’awe mw’erutthu ya mutthu oSotoma. Muupuwele, awo yaamuwehererya mwana a natiri. Nto, naananoru vavirly’aya yeyo, mwana a natiri aahirwa. Eyo yaari ethoonyeryo yookiserya yeyo Sotoma ni nikhuru n’Abrahamu yoonal’aya ahinatthi orwa mwana a natiri. Nyuwo mooweha yeyo? Nto vano Ekereja ya murohoni yoophiya okathi yowo.

<sup>93</sup> Ookhala mutthu oirale, “Munna Branham, nyuwo mwiirale ‘ole aari Muluku?’”

94 Bibilia ohimye wira, Ole aari Muluku! Eyo khentthuna hata otaphuleliwa. Owo ti Elohim. Ti yeyo Abrahamu aamwiihanne awe Yowo. Khula musomi a Bibilia onnisuwela yeyo. *Elohim*, “Ole oomalela mwa sothene.” Owo aari Oopacerya, Ookiserya; Ephattu, n’Imalelo. Elohim! Abrahamu aamwiihanne Yowo “Elohim.” Muluku (ni iletera suulupale ni eHeperi), Elohim; siiso ntoko, “Wopaceryani Muluku,” Elohim.

95 Owo aari Elohim owooniheriwa mw’erutthu ya mutthu, awanrene ikuwo s’atthu, alyaka yolya y’atthu. Amen! Ethoonyeryo wira mahiku ookiserya Muluku onimoorwatho eriyari y’atthu Awe mw’erutthu ya mutthu! Amen! Yesu ohimye wira, “Miteko Miyo sinvar’aka nave-tho nyuwo munoovara. Ni ntoko saaryaya mahiku a oSotoma, siiso enookhala okathi onrw’awe Mwana a mutthu.” Amen! Eyo khentthuna hata otaphuleliwa; eyo entthuna wooniheriwa, ti yeyo entthuna’yaya. Amen. Nyuwo munnaamini yeyo?

Nuuramihe miru sahu.

96 Tith’ihu a Wirimu, hiyo ninnoovahani Nyuwo natiri Anyu ohiy’ula wira Nyuwo moohimya itthu iya. Nyuwo moohimya seiyo. Khavo onwerya okhaliha Masu Anyu makumi muhikhanle Nyuwo. Nyuwo mwaahihimya, “Okhale okokola,” ni waahikhala okokola. Khavo orina otaphulela eyo, eyo yaahooniheriwa.

97 Ntoko nimuhimmy’ahu Yesaya, profeta, “Mwali harusini onorupala,” owo aahirupala; khentthuneya woniheriwa, owo aahirupala. Ti yeyo yaakhumelenle.

98 Nyuwo mwaahimye wira, okathi Owo waarw’awe aarowa oyariwa oPetelahemu, “A oPetelahemu, oYuteya. Khamuhiyo nyuwo ooyevaxa eriyari sa mittethe suulupale sa Yuta, a Isarayeli? Masi mwa nyuwo onookhuma Mukhulupale a nloko Naka.”

99 Itthu Owo aarow’awe wira, ele aarow’awe okhuwela vamwikimanyo, mota Owo aarow’awe olamuliwa, ottyuliwa inawo Sawe ni matata Awe; “Owo ohaaxeriwe mwaha wa soottheke sahu, ni onyakatteliwe sootakhala sahu; ehukumu ya muretele ahu yoomulemela Yowo; makhwatta Awe t’anivoninhe.”

100 Mota Davidi ohimye awe, “Miyo nkinihiya munepa Awe m’okhwani, nnakhala nkinihiya erutthu ya Murumeyi Aka wuntta.” Nto nihiku na neeraru, sihinatthi omalela iwora miloko mithanu ni piili wunttiha erutthu Awe, Masu a Muluku ahimye wira, “Owo onohihimuwa.” (Atthu yaahimye wira erutthu Awe erimwiiyiwa; awo nlelo anaamini yeyo.) Masi hiyo ninnaamini, Pwiya, Masu Anyu! Awo yaahooniheriwa. Yesu Kristu oohihimuwa ni Owo ohimye wira, “Miyo ki . . . Tthiri, Miyo kiri ni nyuwo okathi wothene, mpakha omala w’olumwenku.”

<sup>101</sup> Hiyo ninnaamini wira Nyuwo muri vaava ohiy'ula. Hiyo ninnaamini wira Nyuwo mwa Yesu Kristu ohiy'ula, va, ntoko kwekwe Nyuwo mutonko anyu okhala. Vano Nyuwo pahi munavya maitho, miyono, metto, eyano, minepa, irutthu, seiyo, Nyuwo munthun'anyu orumeela wira mwiisooniherye Mmansinyu. Muluku, munireerihe hiyo ohiy'ula, wira niwerye omoona Yesu Kristu mukumi akhalaka eriyari ahu. Mmuhiye Owo arwe! Nto enimwiiraneya, ntoko etala y'aKresia ale yaarwiye nihiku nle, khwira, "Napwiya, naaphavela omoona Yesu." Nto awo yaahiphiererya omoona Yowo. Oh, oreera xeni waakhanle okathi awo amuwehaly'aya Owo!

<sup>102</sup> Muluku, Nyuwo mwa mmosaru olelo. Ni Nyuwo moohimya wira natthunaru vanci-enexa naamuwerya owoonani Nyuwo. "Okathi vakhani, nto olumwenku khunikoono" (ole oohaamini); "masi nyuwo munookoono, tthiri Miyo kinookhala ni nyuwo, hata mwa nyuwo, mpakha omala w'olumwenku." Hiyo noosuwela wira Nyuwo mwa mmosaru nsana, olelo, ni mahiku othene.

<sup>103</sup> Pwiya, Masu aahimmwa, aalempwa, vano yiiriwe, wa Ovuwa wa Muluku, wira yooniherye wira Owo onnisuka Masu Awe. Amen. Muluku ooreeriheni.

<sup>104</sup> Kinrowa wiihana elinya ya mavekelo. Kookupali wira Billy ohimnye wira ookawa ittikitti sa mavekelo, opacerya emosa mpakha emiya, wala etthu ntoko siiso. Owo khakhanle va vano. Ori. . . Nummaro xeni n'ettikitti ya mavekelo. . . Mutthu awehe ottuli wa yawinyu. . . Nno—nno nummaro ni ele—eletera (A, B, C, D, wala. . .). Ti nvi, A? Vaareera.

<sup>105</sup> Nikuxe A, numaru nimosa, napiili, nattharu, naxexe, nathanu. Mpacerye ovenya so. A, nummaru nimosa, nummaru napiili, nummaru nattharu, nummaru naxexe. Naxexe, miyo nkoonne nivenyaka. Ettikitti ya mavekelo nummaro naxexe. Nimosa, napiili, nattharu. Mavekelo. . . Alekela kwanwerya ovenya. Yaahiweryeke, mutthu awehe ettikitti ya namwattamanani awe, poti arina-ene ettikitti nave ahinawerya ovenya. Vowaakuva vano. Ole ori vale, naxexe. Thanu, ettikitti ya mavekelo nummaru thanu. Thanu na mosa, thanu na piili, thanu na ttharu, thanu na xexe, muloko, muloko ni mosa, muloko ni piili. Mpacerye orwa nno okathi manummaru anyu anihaniw'aya. Nummaru nimosa, napiili, nattharu, murwe mulukame nno. Ettikitti ya mavekelo nummaru nimosa, napiili, nattharu, naxexe, nathanu, thanu na mosa, thanu na piili, thanu na ttharu, thanu na xexe, muloko, muloko ni mosa, mukhale opuro anyu. Muloko ni mosa, muloko ni piili, muloko ni ttharu, muloko ni xexe, muloko ni thanu, muloko ni thanu na mosa, muloko ni thanu na piili, muloko ni thanu na ttharu, muloko ni thanu na xexe, miloko mili, miloko mili n'imoso, miloko mili ni piili, miloko mili ni ttharu, miloko mili ni xexe, miloko mili ni thanu. Ookhala mutthu ohinwerya. . .



106 Kinnimoona mmiravo mmosa vakhaterani ya rota ottuli iwe. Nummaru nanyu naihaniwa, mwan'aka, nto—nto mwaahiwerye okela. . . ahe, muvenxe ntata nanyu pahi, hiyo nnimooapihani nno. Munnona?

107 Akavi mu ahirina ettikitti ya mavekelo nave anwereiwa? Noone matata anyu, khula nipuro. Vaava, ti yeyo, muvenxe matata anyu. Nyuwo munnaamini? Okathi awo anthukumanyiw'aya, nyuwo munnaamini Ila, wira Owo mmosaru nsana ni mahiku othene? Akavi? Mwaawehe arumeyi ala; Solempwa khasinihimya olelo, axinna, wira Owo Namukuttho Muulupale onwerya onimorela ikharari mwaha wootteethya wahu? Eyo akeekhai? Akavi anaamini yeyo, muvenxe ntata? Owo Namukuttho Muulupale onwerya onimorela ikharari mwaha wootteethya wahu.

108 Nto vaari wira Bibilia onihimya wira, “Owo mmosaru nsana ni mahiku othene,” akavi anaamini yeyo? Vano Owo aarowa wira sai olelo? Owo aahaana wira ntoko siiraly'awe nsana. Eyo ekeekhai? Owo ori vai ohiy'ula? Okilaanthi mono woolopwana wa Muluku owerya sothene, erutthu Awe; Eroho Yowarya eri vaava mpani mu, wira emooniherye Yowo.

109 Nwehe, vano moone. Exeni yaakhumelenle okathi mutthu mmosa aakwannyaly'awe nlaya Nawe iwe, muthiyana mmosa nihiku nno? Owo khaarina ettikitti ya mavekelo, naamuhimya, masi owo aahikwannya nlaya Nawe. Nto okathi okwannyaly'awe nlaya Nawe, Yesu aahirukunuwa khwira, “T'ani okikwannyale?”

110 Pedru khumuulumela Owo, khwira, “Vano, Pwiya, khenikhala ntoko yookhalana mana. Vano, atthu othene anthuna wookwannyani Nyuwo. Ankhi wiiraka, ‘T'ani okikwannyale?’”

111 Owo khwira, “Masi Miyo kihoona wira kootteethya.” Akavi anuwela yeyo? *Owerya*, yeyo enihimya “ikuru,” waahikhuma mwa Yowo. “Miyo kootteethya, ookhala okikwannyale Miyo n'ukwannya wa enamuna emosa yoovirikana.” Nto Owo aahirukunuwa khuweha muthukumano mpakha Owo ophwanya vatthu vaary'aya nipuro nne nowamini.

112 Atthu othene yaahela miyono saya anvaraka Yowo, “O Rabbi, hiyo ninniwaaminini Nyuwo,” ni sothene iya.

113 Masi aahikhala mutthu mmosa v'ekeekhai aaminni Yeyo. Vano owo aahikwannya nlaya Nawe ni khwaamini wira aahivonihiwa, okhala wira owo aahihimya mmurimani mw'awe wira aawenryeru wira siiso ti yeyo yaarowa okhumelela.

114 Owo aahirukunuwa khuweha muthukumano mpakha Owo omphwanya, nto Owo khwira. . . khumuhimeerya wira ovuva wawe ephome waahimala ni aahivonihiwa. Eyo ekeekhai? Vano, ti siiso Owo airaly'awe, eriyari ya muthukumano w'atthu.

115 Vano, miyo kinnihimya wira Owo khakhwiiye, Owo onikhala mukumixa olelo sintoko otonko awe okhala. Ni Bibilia ohimmye wira, Yesu oohimya, Mwanene, “Ntoko saaryaya mahiku a oSotoma, siiso enookhala okathi w’orwa wa Mwana a mutthu.”

116 Vano moone, hata wira yoovaha xeni Muluku orin’awe osulu nno, ehana okhala-tho, emosa vathi vo, wira yaakhule yeyo. Owo aahirowa muttethe mmosa, Bibilia ohimmye wira, “Saahikhala itthu sinci-ene Owo ahaawery’awe wira mwaha wo ohamini waya.” Eyo ekeekhai? Ethhu emosaru olelo. Nyuwo muhana omwaamini Uwo. Nyuwo v’ekeekhai muhana omwaamini Uwo. Eyo p’inamuna emosa nyuwo enwery’anyu.

117 Elinya ya mavekelo yoolikana? Vano, atthu othene akhale oottittimiha minutu muloko pahi. Nkisuwenle sinto kimmalela vavo, miyo kihana oophiyaka miloko miili n’athanu wala miloko miraru yeemenle iwo. Masi vano, mulinyani wa mavekelo, khula mmosa a nyuwo iwo mulinyani wa mavekelo onsuwela wira ki muletto wa nyuwo, ni wira nkinsuwela hat’etthu mwa nyuwo, muvenxe ntata. Khula mmosa mulinyani wa mavekelo.

118 Vano vamuthukumanoni vo, ole onsuwela wira miyo nkinsuwela hat’etthu mwa nyuwo, muvenxe ntata. Vano, vano, ela va etthu eneery’aka ohimya, mpatthani, moone. Vano, ela eri va. Arumeyi othene ala va vaplataforma. Ni Kristu oomulapa natiri ula. Moone, yoolempwa. Yaari wira yiiraneye silini? Mahiku ookiserya, okathi vakhani ahinatthi Orwa Apwiya. Eyo ekeekhai? Yaari wira yiiraneye nto.

119 Vano, awo ti Masu anihimmwa olelo. Kahi warya wa Lutero; kahi warya wa Wesley; ni nnakhala warya wa Pentekosite. Owo woothara ephiro oholo vano. Vano, Lutero etthu yooreera; Metotista etthu yooreera; Patista etthu yooreera; awo othene, aPentekosite, oreera. Aakhala a inamuna sothene akilaanthi va ohiy’ula. Eyo khehiyo—eyo khehiyo—khehiyo atthu. Ankhi e . . .

120 Khivaaweryaneya nnakhala omuleela Metotista etthu enimuhimya Lutero, ’okhala wira owo onaamini oreerihwa masi Lutero khaamini. Munnona?

121 Khivanihimeereya muPentekosite wira “oreeriwiha pahi,” owo ohoona wuuluuliwa wa soovaha. Owo kharowa wamini eyo. Nnari, owo ookhalana yoovikana eyo. Munnona? Nto owo p’ukathi wookiserya wa ekereja hiyo waarin’ahu, ni Bibilia onihimya wira khunrowa-tho okhala okathi wa ikereja.

122 Masi ohaana okhala othukumana w’atthu, moone, vano hiyo nri va. Vano, muupuwele, ethonyeryo yookiserya. Hiyo atthu ninnimuwehererya mwana a natiri? Muvenxe ntata. Nyuwo munnaamini wira mwa Osuulu w’Abrahamu mwaha w’okhala mwa Kristu? Muvenxe ntata. Vano, Osuulu w’Abrahamu, mwaakhele ethonyeryo anyu! Eyo khekhanle ota oPapiloniya, eyo khekhanle ota iwe m’olumwenkuni wa miromolelo. Eyo

eri vaava eriyari anyu, ale ahikhanle mw'evitikavitika ele iwe. Mwaamini!

<sup>123</sup> Ookhala muthiyana va, ola mmalapo oomalela wa miyo, oophiyeryaka wunnuwa omosaru. Miyo nkinatoko omoona muthiyan'ola mwa makhalelo aka. Vaari wira kaaniwerya onvoniha muthiya'ole miyo kaammuvonih, aaweireiwaka. Miyo nkinsuwela hat'etthu wa yowo. Nyuwo moomoona owo ovenxa ntata nawe minutu vakhani sivinre? Miyo—miyo nkinatoko omoona. Owo muthiyana pahi omphwanyaneya vo.

<sup>124</sup> Olelo athu arwiye va khuruuha nikuttha na ittikitti sa mavekelo, khitakanxiwa sothene khukaweliwa athu. Mmosa khwakhela nummaru nimosa va, nummaru na namuloko ottuli iwe, nummaru muloko ni thanu, nummaru thanu ni piili, nummaru . . . siiso pahi. Sothene sinootakanxiwa, oholo wanyu, khula nihiku. Nto okathi siniihaniw'aya, siniihaniwa vekeekhaiy okhuma mapuro othene. Munnona? Nto, vano, khivantthuneya nyuwo okhalana ettikitti ya mavekelo, mukilaathi vaavo pahi mwaamini. Xen i ehinwery'aya . . .

<sup>125</sup> Mwiitiinye mmansinyu, ohiy'ula, musuwele ewora xeni enikhal'ahu. Munnona? Vano, ehanle omala-tho, mpatthani. Ehanle omala!

<sup>126</sup> Vano, vaari wira Muluku a Abrahamu oomuhihimuxa Yesu Kristu m'okhwani, ni Yesu yowo oohimya wira mahiku ookiserya ithoonyero imosaru Abrahamu . . . seiy Nlaikha (nenno aari Muluku mw'erutthu ya mutthu) aapakaly'awe oholo w'Abrahamu, okathi vakhani mwana a natiri ahinatthi orwa, Yesu ohimye wira etthu emosaru yaamwiiraneya olelo.

<sup>127</sup> Vano, hiyo itthu s'atomu ni muromolelo, ni sothene iyo, ni evitikavitika awo ary'aya-mo. Hiyo ninnimoona Billy Graham ohitto wu, ni Oral Roberts, n'atthu othene ale iwe; namitthaka a Pentekosite ni namitthaka a maromolelo iwe, hiyo ninnoona sothene iyo siiraneyaka, sikhumiheryaka ethoonyeryo. Billy Graham, teoloko a ekeekhai, yeyo muromolelo enamin'aya. Oral Roberts, mpenuxa a ekeekhai, v'ekeekhai yeyo Pentekosite . . .

<sup>128</sup> Masi nwehe va, yookhala etthu ekina elaiheriwe Osuulu w'Abrahamu. Ohitto iwe awo ari muhina mwa miromolelo; yookhala etthu emosa *ota* wa miromolelo erina okhumelela, yaathukumanyaka athu. Hiyo nnohiya eyo ovira mpakha melo ohiyu.

<sup>129</sup> Nwehe, miyo nkimmusuwela muthiyan'owo. Miyo kinoomurerya ettuli aka. Apwiya Muluku yamuhimeeryaru etthu muthiyan'owo, khino ti—ti ya vatthokoni, khino ti ya musurukhu, khino onoowereiwa; miyo nkinsuwela. Owo onosuwela yakhala ekeekhai wala nnari.

<sup>130</sup> Vano Owo airaru etthu emosaru ohiy'ula Owo aairaly'awe okathi ule, nyuwo mwaammwaamini Muluku yowo Yesu Kristu ohimaly'awe wira aarowa okhala va mahiku ookiserya? Akavi

anaamini wira hiyo ninkhala ntoko oSotoma, okathi olumwenku wothene okenly'aya mukhalelo w'oSotoma? Akavi a nyuwo anaamini wira etthu kooleenlyakani ohiy'ula Ekeekhai? Vano, axaana ni Osuulu w'Abrahamu, mmwaamini Muluku!

<sup>131</sup> Vano, wira mukhumihe-mo mmuruni mw'anyu wira miyo kineererya omuhimeerya etthu muthiyan'ole, kimuwehaka witho wawe, wala okuxa itthu sothene sa telepatia wala etthu p'itthu entthun'anyu osuwela. Mutthu ti mutthu onsuwela etelepatia aahaana okhalana muupuwelo wooreera ohiya wuupuwela yeyo. Munnona? Munnona? Nyuwo mootoko omoona natelepatia alaleyaka Ehapari yooreera? Nyuwo mootoko omoona mulipa-ottharihela minepa alaleyaka Ehapari yooreera, apakaka miirirya ni sootikiniha, amuhimyaka Yesu Kristu okhala mmosaru? Nnari.

<sup>132</sup> Moone, eyo pahi e . . . owo muupuwelo w'atthu. Moone, awo khanoona. Nyuwo munnaamini wira awo khanoona? Bibilia ohimye wira awo yaamukhala. Eyo ekeekhai? "Oothipelela, oowiisoona, oosiveliwa ni sopusuha ovikana osiveliwa ni Muluku, oohaatanihaya, oowootherya akhw'aya, oohisumaaliha, oohaaphenta ale ooreera murima, akhalaka ntoko atthu a othunku, nave akhoottaka Owerya waya."

<sup>133</sup> Khahimye Yesu, mwa Matewu Owarya 24:24, wira iroho sopiili mahiku ookiserya saamuhala owootooha ale Ootthommwa, vaari wira yaaniweryaneyaya? Masi khivanweryaneyaya. Awo yaari mmupuweloni mwa Muluku wopaceryani, ni awo epantte ya Muluku.

<sup>134</sup> Vano, Muluku a Abrahamu, Isakhi, ni Yakope, muhiye esuweliwe ohiy'ula wira miyo kinihimya Ekeekhai ya Nyuwo. Ti Nyuwo, Pwiya. Vowiiyeviha mwaahiye arumeyi Anyu awerye okhumiha miupuwelo saya mphironi, wira Nyuwo murumeele irutthu sahu wa Ovuwa Wanyu. Mwa Nsina na Yesu, Mwana a Muluku. Amen.

<sup>135</sup> Yoovaha exeni? Kahi etthu nyuwo munikux'anyu n'uthikila n'urukunxa. Nnari, nnari. Osuwela moota w'okhuma oholo wira Muluku oovareleni muteko. Yoovaha wiikhumiha pahi, nto Muluku onoovarela muteko.

<sup>136</sup> Muhano ori ottuli waka onimookhwa naanaano aahivonihiweru. Muhano ori ottuli waka omanle ovekeleliwa ni mulopwana mukina, naanaano. Owo orina kankuru. Kankuru ori munipeleni mwawe ni tho mmasasuni mw'awe. Ni owo oomala ovekeleliwa naanaano, vano owo oneererya okhupali ni wamini wira oovonihiwa. Eyo ti SISO ANIHIMYA T'APWIYA! Eyo ekeekhai, muhano? [Muhano onira, "Ayo, tthiri ekeekhai."—Mol.] Yaari yeyo, muuvele—muuvele ntata nanyu vamuthukumanoni. Muluku a Abrahamu nlelo mukumi! Vaareera, murewe mwaamini etthu munaamin'anyu munookhala sana. Amen.

Nyuwo munnaamini? Nyuwo munira, “Ankhi muthukumano?”

<sup>137</sup> Muthiyān’ola okilanthi va ni yawawe...wookiseryani w’elinya, muhano a neenli vaavo. Okathi orukununwaka vavo miyo kihona etthu, etthu mmoononi mw’awe, ikuru sa iphumu sivekhulelaka. Owo orina ovekhulela wa iphumu vancipale. Eyo ekeekhai, muhano? Muvexxe ntata nanyu. Mwaaminiru, ikuru sa iphumu sanyu sinoovukuwa. Muluku a Abrahamu nlelo ori vaava. Owo vekeekhai ti yelee aaryawe, Masu a Muluku a nihiku nna!

<sup>138</sup> Ehali anyu? Nyuwo munnaamini vano? Mukhale oomwaamini Muluku! Aakhala ntoko mwana. Muluku onnisuwela murima anyu, mwali, miyo nnari. Nyuwo munnaamini wira Muluku onniwerya okuupululela miyo etthu evonyen’ye? Nyuwo munoomwaamini Uwo miyo kaaminiru? Kahi ya nyuwo, ti ya mutthu mukina, owo ti murokor’inyu. Ni owo ori ooxankiha, ni owo ori epoma emosa onikela ephoyo nno, Tulare. Ni owo ori oxipiritali, ni orina kankuru mphomeni, ni matothoro aamulopola wira onimookhwa. Kharina hata nrromelo. Ti yeyo. Nyuwo munnaamini? [Mwali, anlaka, onira, “Ayo.”—Mol.] Vaareera. Murina exeni mmatatani? Mukuxe yeyo mwamwiixatherye yowo. Nto muhioverye. Mwaamini! Amen.

<sup>139</sup> Nyuwo munnaamini? Miyo nkinatoko omoona mwali ula makhalelo aka. Masi Muluku nlelo Muluku! Vano, mukileele mutthu oniwerya wira yeyo? Khehiyo epakeliwo ya mutthu wira yeyo. Ti Muluku yole Yesu Kristu aahimmye awe wira aarowa okhala va mahiku ookiserya ni aamurowa wiikhapelela Mmansawe (okathi vakhani Osuulu w’Abrahamu ohinatthi) ntoko saaryaya mahiku a oSotoma.

<sup>140</sup> Vano va, miyo nkimmusuwela muhan’ola, hiyo n’amalapo mmosa ni mukhw’awe, kinoona wira emara yoopacerya okumana nookhalaru. Nyuwo munnaamini wira miyo ki murumeyi Awe? [Muhano onira, “Ayo.”—Mol.] Nyuwo munnaamini wira ala Masu? [“Ayo.”] Ni nyuwo moosuwela wira vaari...Masu ala nlelo annilamula miuupuwelo ni soothuna sa murima. Eyo ekeekhai? [“Eyo ekeekhai.”] Masu ti Mpenuxa, nave-tho, nyuwo mwaweryaru wamini Yawo. Nyuwo munnaamini. Nyuwo mookhuneeliwa, nave-tho, ni muttutthi wooriipela. Owo kankuru. Ni munnaamini wira Muluku onniwerya okileela vatthu kankur’uwo varyawe? Ori vanruponi namukhani, ntoko tothoro sinihimy’awe. Nyuwo munnaamini vano wira munovonihwi? [“Amen.”] Rowani, ni muhioverye nnakhala, nto Muluku onimokhalihani sana. Amen.

<sup>141</sup> Nyuwo munnaamini, atthu othene? Vekeekhai ele Owo aahimmy’awe wira! Mukhalane omwaamini Muluku, muhioverye.

142 Hiyo n'amalapo mmosa ni mukhw'awe. Miyo nkinoosuwelani. Vaari wira n'amalapo, muhiye muthukumano osuwele yeyo, hiyo ninvenxa matata. Miyo nkinatoko omoona muthiyan'ola mwa makhalelo aka.

143 Nyuwo iwo munnaamini? Nyuwo munnaamini wira ti Yesu Kristu? Exeni iyo? Awo Masu Awe. Atthu ala yaakhootta Yawo, awo khanimukhootta mutthu, awo anikhootta Masu. Yaari Masu yaari ota, yahaawerya otthikela muhina.

144 Vano, muhan'ola mmalapo wa miyo. Miyo nkinatoko omoona mwa makhalelo aka. Muluku ti Mpenuxa. Poti ohikhala mwaha w'ovonihiwa, poti ekhanlene mwaha w'etthu ekina, masi Muluku akihimeeraryu mukattiyamiho anyu, nyuwo munookamini? Etthu yoopacerya entthunel'anyu mavekelo, okhala wira, niyaru nanyu khanikhanle sana. Niyaru nanyu nimosa, khamuniiwa sana. Ti yeyo. Eyo ekeekhai. Nto nyuwo mookhalana muhapo mmosa, vano nyuwo munthuna muhiye muhapo owo, ompaha sona. Muhele ekatha anyu oniyaruni wanyu nikumi vano, vaareera, niyaru nanyu nikumi. Vaareera. Vano mmwaamini Muluku ni mutthareke ephiro anyu, ni muhi. . . ni khamunrowa ompaha-tho sona nyuwo mwaaminiru. Rowani, ni Apwiya yooreeriheni.

Mooneke etthu ekhumelenle. Owo khahiyo a ekeekhai?

145 Miyo nkinoosuwelani, hiyo n'amalapo mmosa ni mukhw'awe. Miyo nkinatoko owoonani mwa makhalelo aka, masi Muluku onnoosuwelani. Vaari wira Muluku onookileela etthu emosa ya nyuwo, munimwaamini?

146 Muthukumano wothene onimwaamini? Ookhala onimusuwela muthiyan'ola iwo? Ookhala mutthu vamutukumanoni onimusuwela muthiyan'ola? Vaareera, nyuwo munnisuwela ela yaari ekeekhai wala nnari. Ela yaahaana omaliha mwaha. Ele yaahaana ohimya ekeekhai.

147 Vano nyuwo poti wona etthu ekhumelenle minutu vakhani sivinre. Munnona? Eyo pahi. . . Miyo kinooveveleya. Munnona? Sothene sinikhala sokirikela wona. Moone, Eyo othokorerya. Moone, Eyo Eroho Yowarya. Nkihiyo miyo. Awo Masu alaiheriya nihiku nla. Eyo khenakhaleke opacerya mahiku aarummwa, eyo khenakhaleke. Masi vatthu vahimmw'aya, "Okathi vakhani Mwana a mutthu ahinatthi orwa. Ntoko saaryaya mahiku a Lotthi, siiso enookhala okathi onirw'awe Mwana a mutthu." Oohaamini khanaamini Iyo. Kheniweherereya awo wamini Iyo. Masi ale oowaamini animwaamini Iyo!

148 Vano, Eroho Yowarya yuupulularu ila, akavi munrowa wamini ni murim'anyu wothene, munovenxa ntata?

149 Nyuwo muroohononeya. Muphwannye ehasara n'ikaro, eyo yookhumula makhuva mamosa mamosa muxikoni mwanu. Nyuwo-tho mookhumuwa esyo. Eyo ekeekhai, khehiyo? [Muthiyan'owo onira, "Ayo, mulopwana."—Mol.]

Nyuwo munnaamini? ["Ayo, mulopwana."] Munookhala sana. Mwaattottopele Apwiya.

150 Nyuwo munnaamini wira Muluku onnivoniha mukattamiho wa isyo? Vano muroweke mwaakhele openuwa wanyu.

151 Rwani, muhano. Nwehe nno. Nyuwo munnaamini wira Muluku onnivoniha mukattamiho wa murima? Vaareera, muroweke ephiro anyu ni mwaamini, ni murim'anyu onookhala sana.

152 Rwani nno. Nyuwo munnaamini wira Muluku onniwerya ovoniha muthana anyu, wookhalihani sana? Rowani mwaamini yeyo nto.

Mmwaamini Muluku pahi, ti yeyo tu murin'anyu wira!

153 Rwani, muhano. Nyuwo munnaamini wira Muluku onnivoniha mukattamiho wa nipwipwi? Rowani, mwalyeke yolya anyu y'ohiyu, mwaamini ni murim'anyu wothene.

154 Rwani. Nyuwo munnaamini wira Muluku onniwerya ovoniha wiipa wa makhonyokhonyo? Vano rowani, mwaamini, ni mwiire . . . nto Muluku onimookhalihani sana.

155 Vaareera, rwani. Munnaamini ni murim'anyu wothene? Munnaamini? Wiipa wa makhonyokhonyo, tho. Munnaamini wira Muluku onniwerya wookhalihani sana? Rowani, mwaamini yeyo, mwiire, "Koxukhuru, Pwiya."

Akavi anaamini iwo? Nyuwo munnaamini?

156 Muhan'ola okilanthi va ni ekuwo yooxeerya, avenxaka ntata nawe vaava, onihaxeya ni ikuru sa iphumu vancipale. Nyuwo munnaamini wira Muluku onniwerya wookhalihani sana? Munnaamini? Vaareera. Mmwiixatherye matata anyu muthiyan'owo vakhiviru ni nyuwo vo, mmuhimeerye wira nsu nawe nnookhala sana. Amen.

Eyo vo. Amen. Nyuwo munnaamini? Mwaamini!

157 Va ookhala mulopwana mmosa okilanthi va, orina ovuuva ephome. Nyuwo munnaamini, mulopwana, mukilanthi va? Ayo, nyuwo munivuva ephome. Nyuwo munnaamini wira eyo enoovona?

158 Muhan'owo vakhiviru ni nyuwo onvuuva ephome nave-tho, ni ookhalana mukattamiho wa muthana. Nyuwo munnaamini wira Muluku onimoovonihani? Munnaamini? Muvenxe ntata nanyu mwaakhele. Mwaamini.

159 Muhan'ola vakhiviru ni nyuwo orina mukattamiho ni metto sawe ni eyunu awe. Munnaamini wira eyo ekeekhai, muhano? Nyuwo munnaamini wira munoovonihiwa? Vano, muvenxe ntata nanyu, mwiire, "Miyu kinimwaakhela eyo."

160 Vaareera, mwali ori vakhiviru n'uwu orimwiipiwa. Nyuwo munnaamini wira Muluku onoovoniha wiipiwa iwo, mwali orina

ilumeta? Muvenxe ntata nanyu, mwiire, “Miyo kinimwaakhela.”  
Vaareera, mwaamini.

<sup>161</sup> Muhano ori vakhiviru n’uwo orina mulattu wa isyo. Nyuwo munnaamini wira Muluku onoovoniha mukattamiho wa isyo, muhano? Vaareera, muvenxe ntata nanyu, mwaakhele.

<sup>162</sup> Mwamuthiyana ori vakhiviru n’uwo orina makhutumere. Nyuwo munnaamini wira Muluku onoovoniha makhutumere vo? Muvenxe ntata nanyu, mwaakhele.

<sup>163</sup> Akavi munaamini ni murima anyu wothene? Vano nvenye mwaakhele. Nvenye Oholo wa Muluku a Abrahamu, Isakhi, ni Yakope.

<sup>164</sup> Mwa Nsina na Pwiya Yesu Kristu Eroho Yowarya emorele mpani naanaano ni envonihe khula mutthu ori Oholo w’oMuluku!





*MULUKU TI MUTAPHULELI AWE MWANENE* EMK64-0205

(God Is His Own Interpreter)

Mutthak'ola wa Munna William Marrion Branham, opaceryawene olaleeriwe ni Enkelesi Namararu ohiyu, mahiku yettaka 5, mweri wa Feveiro, 1964, oKern County Fairgrounds oBakersfield, California, w'Amerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2019 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)